

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774

10101 Lusaka, Zambia

Tel: 260-1-290410

E-mail: jctr@jesuits.org.zm

fax: 260-1-290759

web: www.jctr.org.zm

October 2006

Twaamwazy a toba JCTR!

Tulikkomene kapati kumutumina bukambausi bwa Adventi wa mwaka uno 2006. Tulalusyomo kuti injisyo ya lusangano yalo eyo ilanganya makani abukambausi ilasoleka ikuyungizya kubukambausi bwenu mucindi cini ca Adventi. Tulibwene kuti bweendelezi bwabukambausi oobu, bulayungizya bulotwe bwabasololi abo ibabelekela mwami.

Twakabona kuti imyaka yainda ibukambausi oobu bulagwazyilizya kapati kutali mubukombe bwalo, pesi amumiswaangano yatubunga twabakristo, bakubusi alimwi amumipailo yesu.

Ciindi cino ca Adventi, ba JCTR balalumba toonse tobakristo kuti tulangisisye alimwi akuyeeya kumakani akusumpula buleli, makani akulwana makulo, kuleta luvwano alimwi akuleta bululami mu buumi bwabanamaleya. Mukuyeeya zyezyi atuyeeye alimwi luyando lwa Leza lupati lwakuti, "Nkaambo mbobuya Leza mbwaakabayandisisya Bantu boonse bamunyika, wakutuma mwanaakwe simuzyalwa alike, kuti kufwumbwa uumusyoma atafwidilili, pele abe abuumi butamani"(Joni 3:16).

Tulumba ba Fwala Evaristo chuungu bafwundisi bamu Diocese ya Lusaka, balo abo ibakabamba bukambausi alimwi tulalumba basankwa baiya bufwundisi baku St. Dominic's Major Seminary balo abo bakatugwasya kusandula bukambausi obu mucitonga.

Inga twakkomana kapati kunvwa kulindinywe mbomunga mwamba kweendelana abukambausi mbotumupa. Twamilomba kuti mube aciindi cakukkala ansi akulanga-linga mibuzyo njotumupa akuingula mwamana kucita booboo mututumile ncoona cipepa cijisi mibuzyo abwinguzi bwenu. Citampa anvulupu twamibikkila. Fwumbwa ncomuti ambe kweendelana abukambausi mbotumutumina, mulatugwasya swebo kutegwa ciindi ciboola tukabambulule antela kusumpula bukambausi bwesu. Naumulayanda bukambausi obu amutulembele ku: jctr@jesuits.org.zm.

Swebo toba JCTR twamba kuti amube akukkomanana mucindi ca Adventi. Tulamilombela andiswe kamutulombela. Lusyomo lwesu alusumpule ibululami.

Twalumba mube akuliba mulikristo.

Ndamana ndime,

Simson Mwale

Coordinator

JCTR Church' Social Teaching

Ciiyo citaanzi: Jelemiya 33:14-16

Ciiyo cabili: 1 Batesalonika 3:12-4:2

Mulumbe: Luka 21:25-28, 34-36

BULULAMI MUBUUMI BWA BANAMALEYA

Ecino ciindi, tulabona imbunga zyinji mucisi ca Zambia mbozyikkala akubona makwebo anzyizyo mbuyakeenda. Ikumana kwa mwaka, nceciindi cakulanga-linga ibweendelezi bwabo mbubwakabede. Pesi kuli ndiswe tobakristo, Adventi ciindi cakutalika imwaka mupya. Nceciindi cakulilingula akulanga ibulongwe bwesu mbubwakabede aleza alimwi abeenzuma. Cino ciindi ca Adventi nciindi cipati ca cileleko ca leza kuli babo boonse ibasyoma muli kristo. Andiswe mu Zambia, tulalumba ankaambo kalumuno kuciindi cainda cakaliko cakusala antela kuvwota, akulangila kuti basololi mbutwaasala bayakubelekela Bantu boonse.

Kuciinda cakainda ndiza twakazumizya, "ibasololi bateelede" ikubweza zyibaka ziyipati alimwi kabazwide abucengi. Ciindi casika cakulibambulula kutegwa tucilile Jesu Kristo alimwi amyaambo yakwe. Ibasololi besu abalo balitambidwe ikucita ibululami kubuumi bwabanamaleya alimwi amubuumi bwabo. Ibululami nkucita cintu ceelede nokuba kuti kunyina utubona! Eci ceelede ikutugwazyilizya mumucito yesu alimwi amumenso ya bantu abo mbotusolweda.

Muciiyo citaanzi, musinsimi Jelemiya tasisi imajwi aakwe mbuli ba Chewa mbobaamba: "Mneneri Yeremiah sabisa mpeni pa nyama" (Nkokuti, musinsimi Jelemiya tasisi imajwi aakwe yalo ayo yalimbuli cipeni cibosyede). Ulatukulwaizya swebo kutegwa tube bamakaintu alimwi abaluumi ibala abululami. Tweelede ikuzumizya myoyo yesu kutegwa cibe cipailo caleza calo eeco cizwide abubotu kutegwa tsumpule ibululami mucisi cesu.

Cino ciindi tweeelede ikupubuka milandu yakuliyanda yalo eeyo ipa kuti tube bacivwule mwangu. Kuciindi cainda, mubuumi bwesu twakali kuyeeya kuti ooyo ujisi nguzu nguzunda alimwi ngulaakasimpe. Ndiza twakali akati kabaabo bakali kusola kugwasyilizya baabo balanguzu alimwi abavwubi kuti bazunde mutubunga twesu, hena ibubotu bwesu bwabwina kristo bwakugwasyana twakabusowela kuli? Ibululami mubuumi bwabanamaleya mbwakubona kuti oonse muntu nokuba kuti ulamubala antela musyobo umbi muna Zambia. Mukaintu antela musankwa ululeme weelede kubona ibubi bucitika kumuntu umwi mbuli kuti bucitika kuli nguwe. Ncencico eeco injisyo ya lusangano ncoyamba kuti, "kujatisyanaa". Alimwi nincito yesu tobakristo, ikapati aabo bali mubusololi ikubona kuti bacilila injisyo ya lusangano yalo eeyo yamba kuti, "Lyoonse tweelede ikugwasyilizya antela kuwida kubacete."

Muciiyo cabili, Paulo musaante ulatwiisya kuti ibululami bwakasimpe bulalibonya mukujatisyana . Tatukonzyi kwaamba kuti kutazyiba nkokupa kuti tutajatizyanyi abaabo bapengede antela badyamininwa mutubunga twesu alimwi amucisi. Nelson Mandela lyoonse ulatuyeezya kuti, "Kukkala amwi mbunyina" alimwi aba Chewa balamba kuti, "Kalikeka nkanyama tili tiwili ntiwantu" (Nkokuti ibantu mbobakkala antoomwe mukuvwana akujatisyana, banyama mbobakkala aumwi alike)

Twaabona ikaindi ibana Zambia balo aabo bakalikuciswa antela kulicisa mbubakali kubambwa. Ikanjikanji bakali bavwubi antela bakali kunvwana amfulumende baciswa mbobakali kutolwa kucibbadela cidula alimwi cibotu ku South Africa ciitwa kuti Morning Side Clinic. Imapengede bakali kucala muzyibbadela zyesu kabalifwida ankaambo kakubula misamu alimwi azyibulo ziyibotu zyakugwailizya. Alimwi muminzi bamakaintu bamitide bakali kweenda misinzo milamfu, bamwi bakali kuziminina munzila kabataninga tumbuka. Bama dokota alimwi amanasi bakalitakatide kubeleka. Ciboneka kuti kaindi caalikugwasya kunvwana amfulumende.

Basikwaazwa ba Papa wabili mulugwalo lwabo lwamu 1989, balatwiisya kuti, "Ibubotu bwakujatitsyanya, tacaambi ikutatondezya akati kabantu antela baabo bali kule, pesi caamba ikukakatila cabunkutwe akubotya ibuuni bwabantu boonse.

Mazuba aano, ibasololi besu beelede kuleta antoomwe itupanzi-panzi itubotu tujanika mubuumi bwesu alimwi amubukkale bwesu kutegwa kube ilumuno mucisi cesu ca Zambia alimwi kutegwa tube abantu bamusyobo omwe. Beelede ikusumpula ilukamantano, kutali kusalaulana musyobo. Ibasololi besu beelede ikuleta iluvwano akati kesu, kutegwa antoomwe tusumpule ibukkale bubotu. Tweelede ikutebula ibubotu mbutwakasyanga, kutali ikwabana ibubi ambabo. Nkaambo eeci cijaya ibunkutwe ikapati mumilimo akusumpula butolo alimwi amakulo.

Mumulumbe wasunu, Jesu ulatwambila mbotweelede ikupona munyika kakunyina ikubwezegwa abuumi bwamunyika. Jesu ulatwibaluzya kutegwa imyoyo yesu itanoosungwaalili buyo kunywa makoko akukolwa. Nkaambo ibubi obu bupa ba kristo kuti batazumanani amulimo wakutumwa atala anyika aano-walo ooyo wakusangana akristo mukuyaka ibwami bwaleza.

Kutalinyona muzyibi eezyi cipa kuti tunjile muzinyonyono mbuli kona abana basyonto antela kunjila nkaamu ya bu satani. Zyimwi zyindi tatubelesyi kabotu zyipego zyaleza calo eeco cipa kuti katukolwa alimwi akutasyomeka kubayandwa besu. Pesi mulumbe wesu uuzwa muli Luka, tulandwa Leza katwaambila kuti "Atukkale mukulibambila" kutegwa tutabwezegwi azyintu zyibi. Ibakristo batazunyene mumuzumino, ikanji-kanji balayungwa kububi alimwi akutubelesya ilwanguluko lwabo kabotu.

Ibasololi ibakomenede mumaano lyaonse mbaba sumpula ibululami. Notulibambila muciiindi ca Adventi kutegwa tukasekelele kabotu ikuzyalwa kwamunununi wesu, atuyake ibukkale bwabululami alimwi akujatana. Eeci inga twacita mumucito yesu. Atuyeeeye kuti tuli bamukwasyi omwe, walo ooyo uyeeya alimwi akutondezya bulemu kuli umwi-aumwi.

MIBUZYO YAKULILINGULA ALIMWI AKWAABANA MUTUBUNGA

- Mububotu nzi mbomuyeeya kuti musololi kajisi?
- Inga twagwasya buti basololi bacisi alimwi abamucikombelo kutegwa babe Bantu ibajisi bululami?
- Inga twaisya buti bakubusi kuti babe ibasololi babotu alimwi basyomeka?

KASOBANO

Kamuba abantu botatwe antela bone mumukwasyi, kabalila ankaambo kakuti balapenga anzala, ikuciswa alimwi akubula kwakukkala kubotu. Muzyali musankwa katongooka kuti kunyina umugwasya alimwi imfulumende kunyina ncoicita. Imulombe aboole abone ikupenga kwabo akubagwasya kwiinda mukuleta zyakulya kuzwa kwaakwe alimwi akubweza uciswa akumutola kucibbadela kwalo ooko nkwatimubbadelede. Mukwasyi uumulange muntu ooyu cakunyandwa kububotu alimwi akubwaabi bwakwe, ibululami alimwi alukamantano ndwajisi kulimbabo, amana abaambile kuti uyanda kwiima ali bu Councillor, bu MP, antela bu President! "Nduwe musololi ngotuyanda ulanganya bamwi kutali lwakwe antela lwabo beni!"

MIPAULO YAMBUNGANO

- Tulomba kuti basololi bamfulumende bagwasyigwe aLeza mukubelekela ibantu bakwe. *Kotuswilila Omwami! Twakukomba kotuswilila!*
- Tulombele basololi bamucikombelo kutegwa bagwasyilizye ibantu baLeza mukasimpe alimwi amuluyando, kubagwailizya kuti baiye Jesu mubukkale bwabo. *Kotuswilila Omwami! Twakukomba kotuswilila!*
- Tulalomba kuti leza atugwasye kutegwa tube ibantu ibayeeya bamwi, tube alubomba alimwi akutujatanya mubunyina ikapati kuli babo babula zyintu zyinji mubumi bwesu. *Kotuswilila Omwami! Twakukomba kotuswilila!*

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E mail: jctr@jesuits.org.zm

Ciiyo citaanzi: Baruch 5:1-9

Ciiyo cabili: Philippians 1:3-6, 8-11

Mulumbe: Luke 3:1-6

KUULANA MAKULO NCINYONYOONO

Buzuba bumwi neekali kweenzya mootokola mumungwagwa wa “independence Avenue” mu Lusaka, ndakabona mabala aamba kuti “Leza ulikubweni!” acipepa cakabbatikidwe a moota wakali kumbele lyangu. Ndakayeeya kuti ncibotu kapati eeci. Pele alimwi ndakayeeya kuti mazuba ano kulibonya kuti twakalibikkila milawo imbi atala a ili kkumi njaakatupa Leza muli Moses. Twakalipa imbi yobilo: mulawo wa kkumi a kamwi waamba kuti, “kuti na tiwajatwa tacili cinyonyoono;” mpoona wa kkumi a tobilo waamba kuti, “kuti naa wajatwa, kobeja mbuli mbokonzya.”

Toonse tuiibona micelo mibi yacijanza cakuulana makulo, pele tucizumanana ikucikumbatila cilonda ciliboobu. Mu cibemba kuli kambyo: “kwindi abelesha ukwiba imbalala muganda ubushiku, alya nakasuba” (when a rat gets used to stealing groundnuts in the house at night, it begins to steal even during the day). Imbeba kuti yazyibila kubba ndongwe masiku mun’ganda, inga limwi yatalika kubba nolibala zuba. Pele katuzyi lyoonse kwaamba kuti kuulana makulo tuuli buyo mulandu pesi ncinyonyoono cipati kuluyando lwa Leza abantuma.

Musinsimi “Baruch” muciiyo citaanzi casunu ulatwiibalusya kuti tweeleda kwaabana cipego cakukkomana abeenzuma kwiinda mukutwiita kuti tusame icisani cabulemu. Leza ulatulomba kuti tuleke kuulana makulo. Ino inga twaabana buti lumuno akukondwa kuti na katukaaka kweempa icinyonyoono cakuulana makulo? Mwami leza mucibalo eeci ulaamba ulabambulula malundu akuvukkila madindi oonse kuti atupe nyika iluzi-itandabede! Ulatwiita kuti tubambulule bulongwe bwesu anguwe, tusanduke tube Bantu beni muzyiindi zinji twakalibambila tobeni malundu, madindi, aminyinza akuti kesu a Leza alimwi abasimuboma. Nkaambo inzi?

Twakacita eeci munzila zinji kapati katuli mbungano antela endike; iciindi notucita makwebo akuubeja. Tulamvwa bambi balombwa kuti banjile mumamambe ikuti banjizyigwe ncito! Alimwi tulibabwene basimakwebo na ma “company” baboola ikutundulula bantu bana Zambia.

Zyoonse eezyi zilacitika akaambo kabulyato bwesu. Katwaamba masimpe! Atulibuzye! Ino nkaambo nzi ibana bazwa kumikwasyi ipengede nkobajana buyumuyumu kunjila muzikolo zyesu zibotu zya cikombelo? Ino bavubi balaula masena muzikolo zyesu? Eeci ncinyonyoono cipati kuluyando lwa Leza abantuma! Atusanduke!

Muciiyo cabili Paulo musaante ulabalombela ibantu baku ‘Filipo’ ikuti babule kampenda, basalale. Ubalombela kuti Leza abagwasye kuzyiba cibi a cibotu. Aswebo mbubona tweeleda kuba akuyandisisya kusala bubotu kuleka bubi. Kuti na twajatilila kunjiisyo zya bu Kristo inga twaba bakamboni bakasimpe kunyika yoonse akubeenzuma. Cilausisye kujana kuti zyiindi zinji tuyanda kulikkomanisya tobeni-tulaluba bubi bwa cilengwa ca kuulana makulo!

Paulo ulabatembaula baku Filipo akaambo kalubomba lwabo. Ulatuzyibye aswebo mubululami bwesu kapati mukugwasya baabo bapengede kwiindilila akati kesu. Mutonga ulati ‘mucenge ng’ombe mucete atooni’ – zyiindi zinji tulabacenga akubatundulula bacete.

Mu mulumbe wa Luka sunu tuiibalusigwa luyando lupati lwa Leza. Luyando lwakwe ndupati, lulaanguzu kwiinda kulubizya kwesu, kukakilwa kwesu, a milindu yesu njotwakacita. Kwiinda muli Johane mupapatisi. Leza ulatukulwayizya kuti tweempe milandu yesu. Johane mupapatisi ulatulomba kuti

tubambulula mugwagwa wa mwami, tubambulule maumi eesu agalangeneni, tuleke zyilengwa zyibi-tulange ku mwami. Kuti na tulakala kuteelela ijwi eeli akulipona, tunyonyoona buumi bwesu.

Icilengwa caindilila mucisi cesu sunu ncilengwa ca kulibona na kubonwa bupati, bundooma-calo cipandululwa mucitwa kuti: B.M.W. B - wiiminina Bukoko bongaye mbotunywa; M - wiiminina Mali ongaye ngotujana; W - wiiminina Basimbi mbotunga twatundulula.

Eeci ciyanza citupa biyo kukkomana kwakaindi kasyoonto. Pele swebo tobana Kristo tulizyi kuti kukkomana kwakasimpe kulajanwa kwiinda mukusyomeka kuli Leza mubulongwe bwesu, alimwi akugwasya beenzuma munzila zyasalala. Muciindi ca kulangila mwami ecino, tulayitwa a Johane mupapatisi ikuti tuleke zyilengwa zybubeji, akuti tubambulule bulongwe bwesu a Leza alimwi abeenzuma.

MIBUZYO YAKUPAILA MU TUBUNGA

- Ino ndilafumbwa nduumwine biyo nebona ciyanza cakuulana makulo kacitika mu munzi mwangu, mu cikombelo, akooko nkwebelekela? Ino nkaambo nzi ndilaumuna kunyina ancecita?
- Ino ndibalanganya buti na ndibayingula buti Bantu bandaambila kuti ndileke cilengwa cakuulana makulo anzila zyibi zyoonse?
- Ino ndilayinka kutambula sakalamente lya cipubuko lyoonse? Ncinzi nceyandisya cindikomanisya mu sakalamente eeli? Ncinzi nchetayandi mu sakalamente eeli?

KASOBANO

Kamuba aknunga kalanga makani alusumpuko mubusena bwenu, kube amuntu ulanga maali ankaamu eeyi. Muntu oyu abelesye maali ankamu munzila italuzi calo eeco cipe kuti kabunga aka kamane calo eeco cipe kuti bunji bwabantu bapenge alimwi akutasumpuka. Inkaamu ilanga makani amakulo itwe, kwamana imwange muntu ooyu antoomwe amukwasyi wakwe akumutolo kuntolongo. Ibanji Bantu batondezye kutakkomana alimwi akuzumina kuti bakali kuyeeyela kuti muntu ooyu wakali kucita makulo pesi kunyina ncoobacita. Andiswe tulapenzi tweelede kuti tongooka nkaambo nitwamwambila muntu ooyu wakali kucita makulo.

MIPAULO YA MBUNGANO

- Mwami twakulomba kuti tube abuponi bupya-tuleke kuulana makulo, pele tube a luyando kubeenzuma a Leza, luyando lutisandule myoyo yesu a tubunga twesu. *Kotuswilila Omwami! Twakukomba kotuswilila!*
- Kogwasya basololi bacikombelo boonse kuti bacikonzye kukananina akupengela bubotu bwabantu bako bapenzegwa akutundululwa mubuumi bwabo kuti bajane kuona. *Kotuswilila Omwami! Twakukomba kotuswilila!*
- Tulombele tubunga twabana Kristo (SCCs) kuti tucikonzye kutambula Bantu bako boonse, akubabekela kakunyina kuyanda mpindu-tube nkanka zyalulangilo, lusyomo akuumbulizyigwa kuti boonse batundululwa a joko lilemu lyakuulana makulo. *Kotuswilila Omwami! Twakukomba kotuswilila!*

Ciiyo citaanzi: Zefeniya Musinsimi 3:14-18

Ciiyo cabili: Bafilipo 4:4-7

Mulumbe: Luka 3:10-18

BUYANDI BWAKULEKELELA

Leza ngutusyoma mupati kapati kwiinda kwiimpana a kulubizya kwesu. Ooyu Leza ulatuyandaula alimwi ulatucingauzya a moyo walulekelelo. Uyanda kuti tulekelelane mulicesu kutegwa tucikonzye kukumbatizya Bantu boonse kulinguwe.

Muciiyo citaanzi ca Nsondo ino ya Kulangila Mwami, Zefeniya utondezya mbuli Leza mbwalibambilide kututambula a kutulekelela: "Kokondwa, kotangala a moyo wako woose, O mwana musimbi wa Jerusalemu! Leza wacebuka kusulwa kwako." Mumwaka waLusangano wainda, ndiza twakanyemya beenzuma, tubunga, basololi bacisi. Notuswena munsu a mwaka wa Kkilisimasi, twaitwa kuti tubambulule bulongwe bwakafwide. Tulakulwaizyigwa kuti tubambulule manyongwe aaya.

Umwi musololi mupati wacikombelo ku cisi ca South Africa, Bbishope Desmond Tutu, wakapa bumboni mukulekelelana ooku kwiinda masyoonto buyo: "kwiina lulangilo kuti na kwiina kulekelelana". Masimpe ngakutitoonse tulizyi kuti lulekelelano musemo wakuyaka mikwasyi alimwi a cisi cesu ca Zambia.

Munzila eeyi yakulekelelana kwiinda mukusanduka kwakuyeeya a kucita, basololi besu beelede kuti kabavwutukide a bubotu bwa muzumino. Mbuli Paulo Musaante mbwaamba muciiyo cabili kuti kulangila kwa umwi nkukondwa a luumuno kwaboonse akati kesu. Ooyu ngomupailo wa Paulo kuti kukondwa ooku kukomene akati kaba Kiristo baku Filipi.

Kuti twalekelelana akati kesu tuyakubaa luumuno a kukondwa kwini-kwini . Basololi besu bacisi beleede kupa buumboni kuli oonse muntu, kuti balyaabe mukupa cipego ca Kkilisimasi kwiinda mukuboola antoomwe. Mazuba ayiinda, basololi nibakali kulibenga mumajwi nzyobayanda kuyocitila Bantu, tujana kuti bakali kubelesya mabala na majwi manji, bakali kutondekana minwe, alimwi a kuzwangana mukuyosyaanya. Pesi eeno tweelede kweenda kumbele mimilimo iisumpula cisi cesu - "Zambia omwe, Cisi comwe"- kwiinda mukulekelelana muzyibeela zyoonse zyabukkale bwesu.

Kwiitwa ooku kwaambilizya kusanduka. Kusanduka caamba kuba a myoyo mpya, mizeezo a micito mpya. Kuti titwacita oobu kwiina notunga twaba a buleli bubotu. Zyinyonyoono zyoonse, kujatikizya a ziyakusalaulana, zyeede kweempa. Eecino tacisyi ciindi cakutaminana pe.

Sikale wakati "basokwe bakasekana makolyo." Kaambyo aaka katukulwaizya kuti tuleke kusekana muzyibi zyesu nkaambo toonse tuli basimilandu. Ciindi calulekelelo casika. Nciindi cakukutauka mbuli Kiristo mbwayiisya.

Muciindi ca Kulangila Mwami, twatambwa kugwasyilila bacete. Twaitwa kuti twaabane buvubi bwesu a bapengede mutubunga twesu. Katuyeeya kuti bacete aaba nkobali akaambo kamafunze akati kesu.

Mumulumbe wa sunu, Joni Mupapatisi uyibulusya Bantu boonse, kapati basololi, kuti beelede kusyomeka. Mupapatisi wamonkolo basikutezya mitelo a basikalumamba. Joni waambila boonse bali mu ziybaka zya bulemu. Ino, tweelede kubelesya buti zyuuno zyesu?

Masimpe masimpe, cilausisya kumvwa kuti bamwi bapona buumi bwa bundoma kwiinda munzila ziyabumpelenge. Ino inga bababuti a maanda mabotu bobuya, zyimbaya-mbaya zydula, azyisani zyebeeka bobuya, a kuya mukweendenda kumasena mabotu? Masimpe ngakuti inga tibakonzya pe kweendelana a mali ngobapegwa kumamanino a mwezi!

Cilagambya kujana kuti bamwi babelesya zyuuno zyabo kudyaminina beenzinyina. Zyimwi zyiindi basikuyabaila akaambo kukupenzegwa muzyisi zyabo mbebodyamininwa. Munzila zimwi, baambilwa kuti na kabayanda kutola lubazu mubusambali mu Zambia beelede kutondezya kuti baala mali asika ku 25,000 US Dollar, alimwi a kubbadelela katupa kuzumizya kusambala a mali asika ku K2 million. Alimwi aabo bayanda lwiyo mu Zambia beelede kupa K500,000 kuti bazumizigwe kwiiya.

Caino-ino ndakanvwa caano ca mwana musimbi, wakajisi myaka ya kuzyalwa 14. Mukuyabaila kwakwa wakazwa kucisi ca Congo. Mukwiiya kwakwe, mwana ooyu wakali kukkala abanyina balo abo bakali kuciswa kapati. Basimilawo bakajana mwana ooyu ka sambala tulyo tusyonto ku maliketi wa ku Lusaka. Aboobo, bakamwaanga akaambo kakuti wakanyina citupa cimuzumizya kuulisya. Wakakkala mucitolokesi kwiinda kwa mviki yomwe. Lwiyo lwakwe lwakanyongana, alimwi kwakanyina aulanganya baanyina. Musimbi ooyu wakanyina nzila yakujana mali a 25,000 US Dollar, alimwi a K2 million yaziyitupa zyabusambali.

Boonse, kujatikizya beendelezi ba milawo, balagumwa a majwi a mupapatisi. Aaba Bantu bamusyobo ooyu kwiina nobanga baleta lusumpuko muzyooko zyesu a mucisi cesu. Muciindi ecino ca kulangila mwami, toonse twaitwa kuti tweempe milandu yesu yoonse. Tweelede kuswaana a Leza wesu, alimwi a Bantu mbotukkala limwi. Kwiinda mu micito yesu, Bantu balazyiba na tuli bokwa Kristo na pe.

MIBUZYO YA KULILINGULA A KWAABANA MUTUBUNGA TWA BANA KRISTO

- Ino ndiyeeya kuti cipa Bantu kunjila munzila idyaminina bamwi mumunzi a mucikombelo cesu ninzi?
- Kutu na ndimusololi, sena ndibelesya cuuno cangu kuyoosya na kunyemya Bantu?
- Ino mbuyumu-yumu nzi mwejana mukukulwaila kuleta luunvwano mukabunga, alimwi sena ndilabikka nguzu mukuleta lukamantano olu?

KASOBANO

Koba a basololi bobilo, baiminina mbunga yiimpene. Omwe wakazwidilila, umwi watakasalwa. Boonse beelede kulilekelela akaambo ka kutukilana, a kusolweda kalangana mibala mumunzi yesu. Mpoona, umwi mu kabunga ulatunga ciimbo cakulekelelana, bamwi kabayumwide malembe akuti: "kutu kwiina kulekelelana, kwiina lulangilo."

MIPAULO YA MBUNGANO

- Tulalomba Leza, kutu utupe nguzu zyakutambula kulubizya kwesu muzyiindi nitwakalubizya mu majwi a mu micito yesu. *Kotuswilila Omwami! Twakukomba kotuswilila!*
- Tulalomba Leza kutu utulekelele muzyiindi zyiinji nitwakandanya Bantu akaambo kakusolozya kuyanda kwesu. *Kotuswilila Omwami! Twakukomba kotuswilila!*
- Tulalomba Leza kutu utupe camba na nguzu zyakwaamba notwiimikila baabo badyaminidwe mumunzi. *Kotuswilila Omwami! Twakukomba kotuswilila!*

Ciiyo citaanzi: Micah 5:1-4

Ciiyo caabili: Hebrew 10:5-10

Mulumbe: Luka 1:39-44

BUSOLOLI KWIINDA MUKUBEELEKA

Sunu ni Nsondo yane ya kulangila Mwami. Mukulaba kwa liso tuyakusekelela kuzyalwa kwa Jesu, mufutuli wesu a mwami wa luumuno. Tuyakuyeeya kuti myaka ili zyuulu zyobilo yainda, Jesu wakalizyedwe akati kesu, kali muntu mbuli ndiswe. Alimwi wakalicesya mukunjila mubweende bwa nyika ino. Alimwi tuyakwibuuluka kuti nkvacili akati kesu mazuba oonse, muzintu zicitika mubuumi bwesu a mubuumi bwa Bantu mbotupona ambabo. Mubuzuba bwa kkilisimasi, tatusekeleli cintu cakacitika kaindi mubusena bumwi, pesi ciyeeyezyo cakuti Kristo uli andiswe ino, mu Zambia, mumwaka uno wa 2006.

Muciiyo citaanzi, munsinsimi Mika, ulayeezya kuti cisyomezyo ca munanike ciyoosika kutobeelezya mukondo wa mwami Davide, pele munanike ooyu unooli muboombe moyo. Ncobeni, ciimwi cizo ca musololi mubotu nkuba a moyo mubombe/mutete. Kubomba kwa moyo ncecintu cipati ceelede musololi mubotu. Musololi mubombe ulizi nguzu zyakwe, alimwi ulizi a mwalezya.

Muciindi ca muusinsimi Mika, basololi banji bakayandisya buvubi alimwi a zyuuno zya nguzu. Bakalekelezya bacete, a kudyaminina Bantu babo. Dolopo mpati ya Jerusalemu yakazwide basololi bakali kuyandisya nguzu. Basololi aba kwiina nibakalanganya kulilauka kwa Bantu pe. Munsinsimi usyomezya kuti Leza uyakubusya musololi mwini-mwini akati ka Bantu bakwe. Ooyu musololi uyakuba mwami wa luumuno. Uyakuboola kweembela mbelele zyakutanga bwakwe.

Mucisi cesu ca Zambia, twaba a basololi bayandisya buvubi a nguzu. Basololi bamisyobo eeyi mbebeeta lwandaano akati kesu. Tulabona basololi mutubunga twesu badyaminina beenzinyina. Eeci ciletela kubula bunkutwe muzyintu zya tubunga alimwi a cisi.

Ncencico eeco ncecili cipati kunvwa kumajwi akaindi a mu minsinsimi Mika, pesi kapati mumazuba ano. Mika ulatwiita kuti twiye Kristo notuli basololi. Kristo ulaboola kubelekela Bantu akubaswaanganya mubutanga bwakwa naambwa kuti mweembezi mubombe. Uyakuba mwami wa luumuno.

Muciiyo cabili kuzwa ku lugwalo kuba Hebulayo, kutumwa kwa munanike wa Leza kwaambwa kuti nkucita ciyanda Leza: "Ndiliwano O Mwami, ndaboola kucita luyando lwako!" basololi bakasimpe mbabaabo bayowa Leza, baswiilila jwi lyakwe kwiinda mukubelekela bamwi. Basololi bamusyobo ooyu balalyaaba cakumaninina. Nikuba booboo, basololi banji mbotujisi balayandisya kulida bantu masuku aatala a mitwe yabo.

Cilagambya kwiinda kuti na basololi batalika kunvwa ncobaambilwa a Bantu baabo, kuti kwaba bobuya, inga basololi aba batalika kulilanga lwabo beni mukuti "ino mali ngejisi ali ongaye." Balatalika akutukila Bantu babo, kabalubide kuti Bantu mbepakababikka munguzu ezyi. Ba Bemba bakati, "Ubufumu buchindika abene" -- Caamba kuti, basololi balilemeka balalemekwa a bantu mbobasolweda.

Mumulumbe wasunu, wakalembwa a Luka, Leza walemenezya musololi mupati. Ooyu musololi zina lya kwe ngu Maliya, mwana musimbi ulicesya. Ulalubazu mulufutuko lwa Bantu boonse, kwiinda mukulibambila kwakwe mukucita buyanda Leza. Ngonguwe uyakuzyala Jesu, akaambo kaako Maliya waba musololi wakasimpe kubantu boonse.

Notuswena afwafwi a kkilisimasi, tweelede kujalula myoyo yesu mukulumba Leza alimwi a Maliya mukutambula kuba banyina Jesu mufutuli wesu. Mukulicesya, Maliya watambula kuba muzyali wa munanike wesu. Ncombeni watambula kubweza lubazu mulufutuko lwesu. Kutu na Leza wazumizya

mukaintu kutola lubazu mucibela cipati bobuya, ino nkaambo nzi bamakaintu ncobapengana mukudyamininwa?

Swebo tobakkristo tweelede kuti katulibambide kupa bamakaintu ziyibela mubusololi bwa boonse mu tubunga a muminzi. Leza ngonguwe wakatalika kupa bamakaintu cibeela ceebeka, mumizeezo wakwe wa lufutuko. Mukaintu mupati kapati mukuyaka tubunga akuleta luumuno muminzi. Jesu wakazyalwa mumukwasyi wa Maliya a Josefa, alimwi wakapona buumi bwa muntu. Katuyeeya kuti majwi aakwe manji ngotumvwa mumulumbe wakaiya kuzwa ku bazyali bakwe ba Josefa a Maliya.

Mbubonya buyo, bazyali beelede kuzyiba kuti mukwasyi ncecikolo cipati ca busololi. Bana baiya bazyali babo kutondezya bukutwe mu busololi. Alimwi bana balaiya kuzyiba a kulipa kuli ziyanda beenzinyina. Nokuba kuti aano mazuba bukkale bwayuma, bazyali beelede kuzuzya kwitwa kwabo kwakulanga bana babo. Aboobo, cipego cipati muziyali ncanga ulapa bana bakwe nkupona ambabo mubuntu bwakwe, nkupa ciindi cakwe kubana mbakalizyalila. Eeci tacipi mpindu kubana biyo, pele a kucisi coonse mbocizulwa!

Atutole lubazu mukuyaka "Zambia omwe, cisi comwe" kwiinda mukuyiisya bana besu bukkale bubotu. Eeyi ninzila imwi mbotu mukulwana mafunze a kulangana mibala a kudyaminina bamwi. Basololi babotu babelekela Bantu boonse.

MIBUZYO YAKULILINGULA A KWAABANA MUTUBUNGA

- Sena kulibasololi babotu mbandakaswana kale mucisi na mu cikombelo? Ino, zintu nzi ziyitondezya busololi bunkutwe ku Bantu?
- Hena ndimusololi mubotu uusyomwa abantu mbesolweda na? Ino busololi bwangu ndibubelesya buti, mucikonzyanyo ca mu mukwasyi?
- Ino muunzila nzi mwenga ndamanizya kudyamininwa kwa bamakaintu muminzi, a kubagwasyilizya kuba basololi mu tubunga a mucikombelo?

KASOBANO

Koba a Bantu abobilo, mukaintu a mwaalumi, bayandisya kuba basololi mu kabungu ka banaKristo. Kulatalikwa kukazyanya mulicabo, nkabela Bantu bani kulango busongo bwabo a kubikka mamalembe. Nikwamana booboo, kulajanwa kuti mukaintu ngobayanda Bantu banji. Balamubikka mubusololi, nkabela Bantu boonse kubikkilizya a mwaalumi uuya, baya kupa kukondwa ku mukaintu wakasalwa.

MIPAILO YA MBUNGANO

- Tulalomba Taata, kuti utupe basololi basongo, balicesya alimwi bazwide luyando. *Kotuswilila Omwami! Twakukomba kotuswilila!*
- Tulalomba Taata, kuti utumine muya wako kutengwa tucikonzye kusumpula bunkutwe bwa bamakaintu mu masena motukkala. *Kotuswilila Omwami! Twakukomba kotuswilila!*
- Tulalomba Leza cipego cako ca muuya musaante, kuti ubambuluule mikwasyi yesu, kutegwa icikonzye kuba ziyikolo zya bukkale bwa bukristo a busololi bubotu. *Kotuswilila Omwami! Twakukomba kotuswilila!*